



廖惠貞 女士

客語 · 短篇小說 · 社會組

第二名

得獎作品

將心對月

得獎感言

舊年 112 年參加「第九屆閩客文學獎」，第二擺得著評審个厚愛，尤其摻才子王興寶先生摻前輩余惠蓮先生共下得著客語社會小說獎，實在榮幸。又看著認真个邱湘雲教授摻教學豐富个黃秋枝、彭瑞珠、徐熏嫻、鍾鳳珠、鍾聖芳恁多先生得著新詩、散文獎項，更加佩服同歡喜。

承蒙評審委員个肯定，這擺共樣表達新時代爺哀、子女、兄弟、家娘心白、祖孫之間个相處。小說个情節摻場景，表達長者孤栖獨居，又帶「被迫害妄想症」个症頭，想愛親人俾兼，又對子兒、心白、姪女、看護猜疑，故所引起矛盾、恐驚、無奈摻痛苦个心情，連續關心佢个人也畀冤枉。乜寫出對故鄉、親人个懷想。鄉情像一首清越个歌，總係在寂靜个夜響起，有孤燈、電腦做伴，將故園情化成悲喜交織、心焦又遺忘个音符，在心肝肚傳唱。

文學反映生活，乜拏平佢心肝肚个傷感，講起來異見笑，佢輒常一頭寫一頭掙目汁。佢愛寫作，會繼續同翰墨講出對家鄉个眷戀，對至親朋友个想盼，這條路雖然孤栖嗶母會寂寞，佢知有屋下、朋友摻天頂親人恬恬仔个守顧摻痛惜。

感謝鄭安住先生，曾燕春校長多个牽成，感謝張美煜教授、黃秋枝、王興寶先生摻盡多先生个鼓勵，分佢做得行入客家文學个桃花源。黃永達教授講過：「愛用客家文字寫出客家情。」佢會繼續拏等筆在電火下嚙吞這苦澀个滋味。

將心對月

既經十一月中，舊曆也會到九月尾了，天時陣寒陣熱，秋天个腳步到了後，路項个樹仔像比賽樣仔相賽換一身新衫褲，你看哪楓樹青轉黃，臺灣欒樹淥黃變豬肝紅，又變燥絲絲咖啡色；校園肚前庭細路脣菜瓜、瓠仔棚，大皮葉也變黃，伸幾個細瓜仔吊晃槓，金桂隨等西風恬恬飄送清香；大花紫薇葉仔轉紅，漸漸仔飄落，還打子。秋天个色調帶來醺醺个浪漫又帶兜蕭條个風情。異多人家熱天个衫褲準備收起來了，大被骨也拿出來晾，人講：「霜降過，落一擺雨就寒一擺。」朝晨暗晡變涼變冷了。

臨暗邊仔，上班上課个人愛轉夜了，秀彥當煞猛參加課程研習轉來，心肝肚還恹等一〇八課綱核心素養，三面九項，學習重點、學習內容、學習表現……，現代个先生定著愛跔得著時代个腳步，正做得行在學生仔頭前。捷運站尖尖擊人，大家嘴脷仔戴核核，正愛蹶上樓梯，手機仔響了。

「秀彥？佢係二姑，佢分妳个該領長袖白色膨線衫，還佢好無？」

「二姑，……您無分佢膨線衫啊！」捷運站當吵，秀彥手機仔開擴音。

「有啦！早先有拿分妳，妳尋看啊，佢絕對有分妳！妳還後生記才仰恹嬾呢？」二姑大嫲牯聲講，秀彥遽遽撇忒擴音。

「佢轉去尋看哪，尋著正送還您！」頭下旋旋風分厥姑講記才嬾，一時嘎呆呆，緊恹從來就無看著白色膨線衫，敢係自家記才正經嬾？

秀彥想起頭擺初出茅廬食頭路時，在枋橋厝屋，該央時大觀路項還有火車經過，有幾下間學校，「浮洲火車站」就還旨設有，從文化路經過接雲寺，異遽就到浮洲了。包尾秀彥徙到地狹人多个所在，有一擺參加全國戶口普查，知得二姑戴在中和。續等厥細个俵仔李天中登記參選市民代表，二姑摻細姑共下來尋秀彥，愛請佢多多支持，這條親情線正連接起來。

秀彥會利用放寮日抑係有閒時，買兜仔零嗒、果子去看厥姑，像雞卵糕、豆腐花、水板仔、獼猴桃、紅龍果、葡萄這兜。秀彥知阿姑牙齒毋好，會選較軟較好嚙个。該阿姑也會準備等路分秀彥，像香菇、雞卵、餅仔，無就厥俵仔逐星期送來个鮭魚、麵包。在新冠肺炎疫情盡嚴重時，秀彥會帶兜消毒水、酒精、嘴揸仔分阿姑用，阿姑當慶買得著塑膠面罩摻透明目鏡回送，兩子姑互相關心，碗仔來碗仔去，正經人情像鋸，你有來佢有去，感覺真燒暖。

話講該日秀彥轉到屋下，一入門無啉一下茶，黏皮就尋該領膨線衫，頭磬磬在衫架仔、櫃仔、拖箱仔滿哪仔緊搵就無，頭家還問：

「妳尋麼个東西？歸間屋會分妳搵到搵轉來了！」

「佢尋一領長袖白色膨線衫啦！」

「天時旨到恁冷，仰愛使著著膨線衫？」

「毋係佢愛著，係二姑講該膨線衫愛還佢著。」

「妳敢有白色个膨線衫，佢乜毋識看妳著？」

「係啊！白色較遠厝糟，佢異少著，印象肚二姑無分佢正著。」秀彥本旦就老實，逐擺著个外衫毋係烏色就係墨綠、豬肝深色系，加勢有同事會算八字，識講佢係舊曆九月出世，火氣較旺，愛多著烏、白兩色，五行愛平衡，對運勢正有幫助，故所秀彥更加愛著烏色了，看起來正經烏疏滴落。

「看妳搵到恁煞猛，無就照實講佢無分妳，莫過費恁大神氣！佢肚枵囉！」

「好啦！佢遽遽來煮飯！就摻二姑講佢無分佢，無愛過搵了！」

第二日狗旨吠雞旨啼，天就旨光，電話又來了。

「秀彥，該領長袖白色膨線衫有尋著無啊？就會變冷了，二姑自家愛著。」該聲脰共樣緊拚拚仔，二姑愛運動，三、四點跣床就去公園行路，摻朋友坐寮，故所正恁會早。

「二姑，佢尋無，該膨線衫您無分佢哦！」

「秀彥，佢明明有分妳，妳莫講花蓼。」

「二姑，……」

「好啦！一領衫仰恁難尋哪，抑係妳又送分別人了，佢敢有腳會走忒吓？」阿姑有兜仔無歡喜講，也無耐心聽秀彥解說。

「二姑，敗勢，您莫譴，佢再過尋，尋著正送還您。」秀彥試著毋知愛仰般解釋正好，明明無該領白色膨線衫，愛仰般生出來呢？秀彥心肝肚恁，會係二姑自家老癩俾無？秀彥佬著事情就恁仔過忒了，嘎毋知這「白色膨線衫」事件，係一個煩惱个起勢。

二姑本名良妹，大了後佢嫌名仔忒俗改成翠英，生來高大身裝仔盡靚，後生讀到高中畢業，識分美國人教過，故所英文異好，衫褲全係在東興橋頭个阿粉裁縫店定做，日日就亮線亮線。包尾嫁分軍位異高个阿山仔哥，惜舖娘又顧家，生活過來當好。降有兩個俾仔，頭路都做來順順序序仔，大个元中自家開福安電腦公司，生理越做越大，大陸乜有設廠，不時坐飛行機飛來飛去；細个天中有參選市民代表過，在貿易公司上班，隔一、兩禮拜會轉來看阿姆。奈日元中會帶阿姆摻舖娘、三個細人仔共下去飯店食飯，成時天中堵好有轉，也會共下去。飯店裝潢金若若仔當氣派，碗盤像藝術品樣大方又罕得見，難怪食一餐飯輒常愛萬過空銀，元中無瞞一下目，毋過該阿姆會講：

「異無彩，食一餐愛萬過零銀，恁耗爽，係拿錢分佢來辦，做得煮三擺一桌仔滄滄豐豐沛沛哦！」客家婦人家斯異會料理會打算，蒸、煮、燉、滷、煎、炒、煲、燜……就難毋著佢兜。

「阿姆，莫恁樣講，阿哥賢孝您，就係請您打扮到靚靚，輕鬆來食飯，毋使無閒直掣，還愛撿掣、洗碗。歡喜來享受就好，莫想恁多！」貼心个天中勸話阿姆，該日菜色多又萋，大家就食到肚圓圓仔。

「元中，該紅豆包仔摻蔥油餅點心還伸恁多，係罌忒就忒打爽了，佢帶轉去分若表姊秀彥食好無？」

「阿姆，您逐擺出來食飯就念等佢，佢敢係若妹仔，有恁重要吓？」元中口氣無麼个好，像嫉妒阿姆恁惜表姊樣仔。

「元中，佢想若表姊逐擺有閒就買點心來，陪佢打嘴鼓。佢無特別惜佢，單淨摻佢分享。」

胚想佢教書教客語，賺無麼个錢，怕當少來這高級个大飯店啊！」阿姆儕思量秀彥教書辛苦，尤其這下个細人仔無比得頭擺，少子化逐個像寶貝，盡難教。又看著大俵仔恁會呿，無麼个暢樂，心肝頭搵搵。當想講：

「元中，莫呿佢惜佢，若表姊秀彥比你兜較貼心，會陪等佢，摻佢做伴打嘴鼓。哪像你兩兄弟，東西一放、看看啊，講無兩句話，無食一餐飯，屎脬旨坐燒，就瀉走！」毋過阿姆儕忍等無講出嘴，尤其心白在脣頭，莫話著係啲洗佢，佢一毋暢面逼逼該就麻煩囉，元中就愛忍受厥面色了。三個孫仔長大了，顛倒無道，無像頭擺親暱暱搵等人，又嘅又做嬌。見面淨喊一聲「阿婆！」續下來就頭磬磬仔搞手機仔，摻手機黏到核核做低頭族，愛放下來像愛厥命樣仔，斯無恁該，識提醒佢兜講：

「你兜食飯莫傍手機仔，恁樣會毋消化，這位光線暗，對目珠乜無好。」佢兜當時恬恬，嘎在屎背尾講自家恁足相，當無歡喜投厥爸講：

「阿婆當囉嗦，恁好管人，當得人惱。哼！佢兜搞手機又無犯著佢。」元中無教細人仔，愛聽阿婆个話，還仔仔爹爹講分阿姆聽，愛阿姆莫再過講佢兜，過後老人家就自重了，雖然老祖先講「牛愛柴鼻，人愛教示」、「惜骨莫惜皮，惜皮無面皮。」就乜無再講，免得博人惱。阿姆實在想對佢兜講：

「見面三分情，開嘴七分情，一句正來奈，當過歸十斤。」偲俚客家恁好个人情道理，仰毋知？自家就做世大人了，還無知輕重？還恁縱子，恁毋知人我？難怪無法度了解自家逐擺會想著姪女仔秀彥。話講秀彥這頭哪知二姑子哀仔會因為自家來打毋堵好，係知秀彥會講：若姆盡惜个還係你兜兩兄弟，佢單淨係厥姪女定定。這乜係包尾事情會變麻煩个源頭。

秀彥本本有閒就去陪厥姑，聽阿姑講頭擺耕種个事情，阿公阿婆愛耕園又耕圃仰般做，有時阿姑自家改衫褲，將褲頭裙頭放冗，秀彥會摻佢搵手紮針線、攣衫腳；廳下个電火燒忒，等毋著兩兄弟轉來，秀彥會換好勢；垃圾來毋掣倒會帶轉社區倒。成時二姑會拜託秀彥去溪州市場買胛心、排骨無就後臀肉，還特別吩咐：

「係 36 號攤仔，大門落去左手析再轉右手析，佢兜賣烏毛豬肉，毋會恁臭臊。」

「還過，莫開口討愛豬油抑係豬皮，店頭家想分就會分偲俚，莫分人佬著偲恁貪。」阿姑儕當自重知事理，就係無愛批人，無愛分人過嘴，秀彥記在心，毋過乜著一下驚，因為佢輒輒會

開嘴討。

記得第一擺心冠肺炎疫苗注射个日期，元中堵好愛出國，交代舖娘竹梅講：

「拜託你載阿姆去注莫德納疫苗，這擺老人家排到頭前優先注！」

「無愛啦，愛載細人仔上下課，喊阿姆自家坐計程車！」

「驚阿姆老人家尋母著位所，在市公所，愛蹶樓梯，注射後又還愛觀察！妳在脣項，佢較放心。」

「好啦！佢去載佢。」心白包尾還係帶等去，注好勢轉中和到大路脣放佢下車後，就大伯伯直直駛走了，因為新車仔忒大臺，無法肚駛落巷仔肚。該心白儕完全無講一聲：

「阿姆，若係艱苦無鬆爽愛打電話哦！」抑係吩咐講：

「阿姆，愛多淋滾水、多歇睏。」老人家自家就慢慢仔怙等拐棍仔行入巷仔轉屋，藥性開始發作，頭那正經有兜仔昂，也刻耐仔行。

該暗晡嘎落雨，無想著秀彥騎等車仔，拿著放圖牆頂高个鎖匙打開大門，在窗門就看阿姑坐到人客廳看電視，就問講：

「二姑，您有發燒無？」

「唉哦！係秀彥，佢話著係吾心白竹梅，想講仰恁好空，會來看家娘。」

「二姑，全身會痠痛無？佢送來退燒藥摻運動飲料，係有發燒愛食愛淋哦！頭那正母會恁痛！」

「落恁大雨還跔工送來，頭那毛涿到潦潦，遽遽粹燥，莫寒著了！」

「秀彥，承蒙妳！妳看吾心白就無行前一步哦！」阿姑拿等大手帕分姪女仔粹頭那毛。

「二姑，若二樓个暖壺佢摻您張滄燒茶，半夜您就毋使蹶上跋下淋水！」秀彥粹了頭那毛，又張滾水放二樓，阿姑看著當毋盼得又感心。

「二姑，毋使客氣，佢戴較近，佢兜駛車仔來，還愛一段時間。自家阿姑毋關心，該愛關心麼儕呢？」秀彥安慰阿姑，佢普普仔乜知厥心白个事。秀彥來看阿姑，除忒想摻阿姑做伴，還享受該親情，逐擺愛離開時，二姑總會企到大門前緊攞手送等秀彥，一直到當遠正入去。摻秀彥阿爸共樣，秀彥轉妹家，愛轉時，阿爸總會企到大門口頭臥臥緊望，毋管秀彥係行路抑係駛車仔，阿爸總係緊攞手送等秀彥一家人，每擺秀彥毋敢斡頭看，驚怕又心焦，又當想斡頭看。看阿爸恁毋捨，恁惜自家。幾年前阿爸過身了，失忒至親秀彥盡傷心，人講：無爺無哀路邊草，無世大人痛惜，堵著客家難題也無好問，毋過在二姑這，像又尋轉阿爸个身影，尋轉世大人个痛惜。

人講：「天有不測風雲，人有旦夕福禍。」生活肚會堵著麼个事情就毋知，有句話乜講：「毋知無常先到，抑係天光日先來到。」佷年下仔，愛過年了，有一日下晝阿姑儕攞等餅仔，準備坐公車去恩主公拜喏，祈求一屋大細平安康健，在站牌前等車，嘎分魯夫个後生人撞著，「砰！」厥腳骨無力就橫下去，阿姑儕喊一聲：

「阿姆哀！右手析大腳髀仰恁痛，佢停動毋得，蹶毋起來。」脣項熱心个人黏時打119電話。

「阿婆，撿怕骨頭斷忒了，您莫停動，等救護車來！」有婦人家行前來細義个提醒。

「拜託你兜聯絡吾大俵仔好無？」阿姑拿出手機仔尋著元中電話。

「哦伊哦伊哦！……」救護車來了，擔架將阿姑儕扛到車肚，就直接送醫院了。

在醫院急診室，先照電光，抽血，護士來問身體康健問題，分阿姑揣著了，醫生講：

「伯姆，若大腳骨斷忒了，黏時愛開刀。」

「您个屋下人有來無？愛填資料摻同意書。」護士續等講，話正講煞，元中就趕過來了，當緊張問：

「阿姆，您仰般？哪搭仔艱苦？在哪分人撞著？」元中看著先生企脣項，又遽遽問：

「醫生，佢係厥俵仔，請問吾姆這下仰般形？會嚴重無？」

「若姆大腳骨斷截，愛黏皮開刀。老人家盡驚跌倒，愛當小心！」

「佢係分騎車仔个後生人撞著个。」阿媽儕遽遽解釋。

「阿媽，佢逐擺講，請您出門坐計程車，較安全，您看坐公車省無兩點錢，顛倒危險。」元中無奈何，過一兩日又愛去大陸，佢無講出來。該暗晡星光半夜正開好，元中先在醫院掌一夜，當有耐心扶等阿媽食藥仔，換尿裙、兜尿盆，元中試試仔參詳講：

「阿媽，佢來請看護好無？」

「愛使呢？僅可換尿裙仔，莫花這錢，做你去公司，竹梅做得來照顧。」「佢愛載細人仔上下課，無辦法歸日仔在這。」三個細人仔既經讀大學、高中、國中了，還日日接送，惜到像命袋仔樣。

「該時間係到了，做佢去無閒，係有事情，佢會拉鈴仔，請護理師搵手。」

「阿媽，還係請看護，佢較放心。」

「該一日愛花幾多錢呢？」阿媽儕就驚俵仔耗所費。

「佢問過了，一日 2800 到 3000 個銀，價數異公當，毋過假過年可能會起價。」

「唉哦！無做麼个就愛 3000 個銀！」

「阿媽，該花錢就愛花，若身體較重要，錢做得過賺，所費佢會負責，您毋使愁！」

「好啦！你決定就好！」阿媽想著手術費、歇院、醫藥費加看護費，愛花恁多錢，當毋盼得，俵仔恁決截……由在後生人主意了，元中應該毋會尋老弟天中共下出正著。

天中有跔等師父修行，前一站仔識摻阿媽講：

「阿媽，這一兩年，您有一個劫難，愛細義，無事情盡量就莫出門。」

「佢知啊！加勢新冠肺炎恁嚴重，高不將正去醫院拿藥仔，轉到屋也遽遽換衫洗身。」

天中接著阿哥電話，也趕到醫院看阿媽，元中堵好處理事情，兩兄弟無堵頭。

「阿媽，感覺仰般？傷口當痛哦！」天中知阿媽當會忍。

「有食藥仔，較無恁痛了，顛倒你自家愛照顧好，該趙小姐還有……」

「阿媽，過忒个事情，莫講哩！」

「莫嫌阿姆囉嗦，有一個伴較好，互相做得照顧。摠趙小姐十過零年，屋仔買畀，就恁樣分開……」

「阿姆，佢知啦！您開刀身體較虛，這參仔分您食，愛配合先生，藥仔愛食，骨頭開刀，弓蕉莫食哦！」天中拿一罐參仔分阿姆，天中買東西當大出手，知阿姆愛派頭，生日送一隻瑞士名牌手錶仔，就愛三、四十萬，一副抵日頭目鏡愛三、四萬，當盼得買；元中也共樣出國買香奈兒名牌包一隻愛一、兩十萬，乜當煞手買，毋過就係無時間陪阿姆，這個空仔堵好秀彥來補。秀彥買魚、肉、水果去，阿姑會講：毋使帶東西來，你係過意毋得，就帶幾粒仔饅頭來就好，阿姑盡思量人。

「唉哦！高麗參，你又耗錢了。天中，你看若哥有三個細人仔……」阿姆又開始溜麵線了。

「恁樣當好啊！阿姆您毋使愁，慁李家有後代了。」

「阿姆希望你有自家个家庭，有中意了个對象，帶轉屋下分阿姆……」

「好啦！阿姆有麼个事情正摠佢聯絡，佢乜會問阿哥看醫藥費愛對開無？」一講著對象交朋友結婚个事，天中就緊閃，驚阿姆唸唸唸唸。

「你兜兄弟仔正參詳。」阿姆儕講公當話。

第二日，阿姆就知大俵仔愛出國，乜摠俵仔參詳：

「元中，出院後，阿姆做得戴若該片無？」

「阿姆，無方便啦！因為過年佢兜有定好个活動會出去，細人仔乜有安排，學校有線上冬令營，您還係轉去中和，佢本本會請看護。」元中直接打白講，無愛阿姆戴厥屋下。

「你講過年期間看護費會起價，佢問過阿美嫂，係起雙倍，一日愛 6000 籊，實在忒貴了，像土匪愛搶人，還係歇若該位！」阿姆儕毋死心，緊膏嗟俵仔。

「阿姆，堵著了，無辦法！就係一萬銀乜愛請，您總愛有人照顧，就恁樣決定您轉去戴。」元中个心異硬，由在阿姆仰般講乜毋會心軟。五日過後，出院該日，係年三十，元中七拜託八拜託阿美嫂留下來，轉到老屋，人客廳元中早就準備好一頂單人眠床，前幾日又在網路定幾下樣過年菜色，臨暗就送來了，元中早就按算阿姆愛轉中和戴。該暗晡還包一個大紅包分阿美嫂。

「頭家，佢先聘好佢無摻人洗衫，乜無煮飯哦！」阿美嫂先講在頭前，因為阿姆儕嫌洗衫機洗毋淨，日日用手洗，正用脫水機脫水。元中高不將摻電器行連絡買一臺洗衫機，又遽遽請人在前庭安水道，還過買一個快鑊分阿美嫂燉排骨、燉雞湯；又買果汁機打果汁。

「元中，莫阿美嫂要求麼个就買麼个，厥目珠當利知你好講話，佢也忒懶尸了，洗幾領衫又會仰般？」

「阿姆，您乜莫嫌佢，佢若係張走，無人照顧您哦！」俵仔緊提醒阿姆，佢知自家阿姆省儉又當孤老，一隻錢打二十四隻結來用，毋過對別人又當慨。

這期間秀彥還係去看阿姑，頭先尋無人，line 分元中，正知阿姑歇院手術。大年初一就帶等紅包摻雞精去，看著人客間擺一頂眠床分阿姑睡，阿美嫂坐在膨凳，方便就近在脣頭照顧。

「二姑，您有較好無？」秀彥看著助行器。

「手術个地方還腫腫，會痛哦！毋過先生交代還係愛練習行，該斯刻耐仔練習，運勢恁毋好，這個坎過毋去，當衰又賺痛！」該看護阿美嫂去買早餐，秀彥乜愛轉彰化過年。

「二姑，壞運就會過忒了，若右腳較食力毋著，企起來斯愛慢慢仔，助行器愛拿好，定著做毋得跌倒哦！過幾日正來看您。」

「秀彥，錢還妳，阿姑拿紅包袋仔就好，莫推來推去，二姑驚跌倒。」「二姑，該係分您帶來好福氣，毋使客氣，佢乜會賺錢。」

「好啦！佢知，還係拿紅袋仔就好，遽遽去轉，大年大節驚會塞車，該桌項个令果帶兩隻轉去。」秀彥知二姑個性，無過堅持。

過幾日，秀彥從彰化轉來，疫情期間過年大家毋敢出門，就囡在屋下，秀彥摻頭家轉去看阿哥、阿嫂、大娘姊、姊丈，帶等路同紅包，分老嫩大細。大娘姊乜大包細包攞，青菜、果子、魚、肉、羊肉爐這兜，車後斗擺到淦淦。

秀彥帶等溪湖羊肉爐摻葡萄去看阿姑，同阿美嫂共下去灶下用快鑊煲羊肉爐，阿姑一下仔就鼻著香味了。

「若姑个親戚，淨妳來看佢，佢乜異孤栖。」阿美嫂看頭知尾，細細聲講。

「阿美嫂，佢戴較近騎車仔過來當利便，其他親戚歇較遠，較毋方便，尤其疫情期間，莫出門較好。阿美嫂，承蒙您大年大節來陪吾二姑！」

「乜就頭家緊拜託，佢高不將應承，毋過初九天公生摻初十兩日，佢想請假，轉去看一輪仔，過年前後佢完全無在屋下。」

「該您愛摻吾二姑、表老弟元中參詳，看做得無？」

阿美嫂講了後阿姑答應了，秀彥想著二姑開刀無幾多日，腳跛啊跛仔，行無幾步路，萬一半夜毋堵好跌倒，愛仰結煞？就摻二姑講：

「二姑，天公生阿美嫂請假，佢來陪您，乜過一暗晡，摻您做伴。」

「該斯好了，愛轉去摻陳主任講一聲無？」陳主任係秀彥頭家，在學校做主任，二姑當客氣就躉等喊主任，無喊厥名仔育林。

「二姑，應該無問題，進前吾家官、家娘青光眼摻盲腸手術，暗晡頭佢乜在佢兜間房鋪架仔床，陪到晷項睡，半夜愛喊人較方便，乜分世大人安心。」秀彥照實講，佢摻家官家娘歇一、兩十年，盡知老人家愛人照顧，愛人勾惹个性質。

「初十這日佢有研習，就請竹梅抑係阿翎來陪好無？」阿翎係二姑大孫女，今年讀大學了，細妹人較貼心，來照顧較堵好。

「妳恁有心，元中、天中、竹梅佢兜斯無恁會想！」

「二姑，無相干，佢摻元中試講看啊！」

「就講佢兜無可能來，秀彥毋使打電話，怕係菜籃核水無採工啦！」二姑當有把握講，佢忒了解自家俵仔摻心白，元中結婚後就像舖娘降个，竹梅講麼个就毋敢聲，胚想，用膝頭想乜知，這擺元中毋肯分自家戴佢該位，應該係竹梅个意思。人講：「不孝心白從子起。」正經有影。

秀彥毋相信，無試看啊哪知呢？利用下課時間打 line 分元中，手機仔有 line 以後，聯絡事情利便多了。

「元中，阿美嫂講初九天公生摻初十兩日，佢想請假。」

「佢知啊，佢愛轉去看屋下一輪仔。」阿美嫂應該有摻元中講。

「元中，天公生這日佢去陪，過一暗晡，初十這日就請竹梅抑係阿翎來陪二姑好無？」

「妳毋使恁費氣去陪吾姆，正兩日定定，無相干，做妳去無閒，吾姆無事情啦！」

「元中，若姆開刀旨半隻月，還係愛細義。」

「竹梅摻阿翎有佢兜个事情，承蒙妳个好意，妳毋使去陪吾姆。」

「元中，抑係……」秀彥話旨講忒，元中賴就切忒了，正經分二姑揣著著，薑嫵係老个辣。秀彥單淨佬著佢兜無閒，匆毋出時間陪家娘摻阿婆，無想著元中對自家个好意，完全無接納，感覺係多管閒事，好心像分雷唛樣仔。

正月半該日堵好係寮日，該朝晨秀彥買好菜，乜買十隻菜包，阿林摻俵仔就盡好食，拿四隻分二姑，恁堵好元中帶等舖娘摻三個細人仔轉來，聽講竹梅在路口車仔項掌車仔，二姑看著俵仔孫仔轉來當暢，黏時吩咐秀彥講：

「灶下壁櫥背項有三隻紅包，佢舊年十二月邊仔準備好个，妳去拿過來，佢愛分三個孫仔。」秀彥因為知位所，異遽就尋著了。

「承蒙阿婆！」三個孫仔阿翎、阿倫、阿宸，拿著當歡喜，讀國中个阿宸當得人惜，還接等講：

「阿婆！恭喜發財！新年快樂！」阿婆暢到嘴就合毋密，續等又講：

「秀彥，妳上去二樓吾間項，梳妝臺右手析第三隻拖箱仔肚，有一個塑膠袋仔張等貯金簿、印鑑、提款卡，妳去拿下來分佢好無？」秀彥像乖莊个使婢仔樣，黏時蹶上二樓。

「二姑，佢尋著了。」秀彥對等樓下講，行下樓梯，半路元中蹶上來就講：

「該東西交分佢就好。」元中伸手接過去。

「二姑，佢將貯金簿、印鑑、提款卡拿分元中了。」

「好啊！佢就係愛交分元中保管，恁樣較安全，密碼係吾出生年、月日。380……」

「阿姆，毋使講出來啦！」元中阻擋阿姆講出來。

「無相干，這無別人，阿美嫂堵好出去買東西。」

「還係愛細義兜仔，莫摻錢開玩笑！」元中提醒阿姆，秀彥心肝肚想：其實佢乜知密碼係380526，舊年有畢業校友送當靚个阿姆節捧花，堵好這日二姑生日，秀彥轉手送分二姑，二姑還拿出長型大大个玻璃盞仔來插。還有一擺二姑無鬆爽拜託佢去領錢，這係元中毋知个事情。

「這又無外人，單淨係自家人。」二姑又講加一遍，秀彥想自家應該係外人，第一擺有分人防等个感覺，毋過又想生理人可能對這兜事情較敏感！

有一日，正下班就接著二姑个電話。

「秀彥，妳做得來阿姑屋下無？吾玉石毋見忒了！」

「二姑，您會放到別位無？」

「無啊！本本放到拖箱仔該位。」

「二姑，您無上去二樓，仰知東西毋見忒？」因為這站仔二姑就睡樓下客廳，還無辦法蹶樓梯。

「係佢喊阿美嫂，將拖箱仔拿下來分佢看！」

「好啦！二姑，佢大約20分鐘後會到！」下班時間，十字路口青紅燈多，車仔多，一等就愛幾下分鐘。

秀彥車仔正停好勢，阿美嫂就打開門，無歡喜講：

「若二姑賴佢做賊，偷厥玉石，佢根本無去二樓，仰恁怪奇呢？」

「阿美嫂，莫發譴，可能吾二姑自家放毋著地方了。」該阿姑聽著秀彥來了，也大聲講：

「妳兩儕在該嘍嘍啣啣講麼个，秀彥，遽遽落來啊！」

「二姑，佢水衣掛好就落去！」今年春季三不二時落雨毛仔，秀彥一行入。

「秀彥，妳知無？阿美嫂偷吾東西！」二姑直接劈過來。

「麼个東西毋見忒？會係您自家毋記得放到哪呢？」

「就係珍珠骰鍊摻玉石，妳莫恠著二姑老了，佢記才當好。係麼个腳土，佢睺啊過就知！」

「二姑，愛佢摻您尋無？」秀彥知二姑個性，無分人主意，好意問。

「好哩！妳看梳妝臺左手析第三個拖仔，有珍珠骰鍊摻玉石無？」該二姑想撿採東西毋堵好跌下來，離地泥較近，正毋會跌碎忒。

「佢做恁多年看護，從來毋識分人賴做賊，佢毋會做這種事。」阿美嫂實在異譴，斯看在工資高，後生頭家對佢客氣，正忍下來。最要緊个係這消息做毋得分公司知，無這頭路就難保了。

「二姑，佢先上去尋看啊！無一定尋有。」

秀彥記得右手析第一格放食个藥仔，第二格放搽个藥仔、藥膏、消毒水、棉紗。第三個拖仔放二姑个貯金簿、印鑑、提款卡，這下交分元中保管了。還放有幾本簿仔，記平常大細事，寫感想心情。二姑識唸畀聽，聽著異辛酸，因為佢發切講：

「淨伸佢一儕人戴，無人插，無人愛，無一定哪日死在屋肚、臭忒綿忒，都無人知。兩個俵仔都毋肯留在骨項……」秀彥聽著也當難過，思量老人家一儕人歇一棟兩棧个老屋仔，故所就安慰講：

「二姑，莫恁樣講，佢兩兄弟當賢孝，會照顧您个生活，因為愛做頭路較無閒，無辦法輒輒轉來。佢有閒就會過來摻您打嘴鼓，抑係二姑您做得打電話分佢，佢係無接著，也會打分您，同您講幾句話。」秀彥總係代兩兄弟講好話。

話講該左手析第一格拖仔放頸圍仔，摺到齊齊，有賁个摻絲仔个，有一擺二姑拿等一條花色浸青靚靚个長圍巾愛分秀彥。

「這條係天中女朋友幾年前送个，佢無用著，送分妳！」

「二姑，您自家留等用，佢自家也有當多。」

「也好，人講莫送絲巾分人，兩儕會斷情，佢留起來好了。」二姑就收起來了，秀彥第一擺聽著這講法。

第二格放手落仔，有幾下樣色，擺到好勢好勢，看第三格有手帕，秀彥摸看啊，無看著盒仔抑係珍珠骰鍊摻玉石；秀彥從第一、二格再過尋，還係無看著。

「秀彥，妳有尋著無？」二姑在樓下大聲問。

「佢旨尋著哦！等加一下仔！」秀彥想二姑會顛倒放到右手析無？拉開第三格，布仔先啊開，就看著幾個盒仔，打開長型个，裡肚裝等珍珠骰鍊，細盒个有禁指玉石、青玉手鍊摺耳環，秀彥當歡喜，大聲講：

「二姑，佢尋著哩！」

「妳遽遽將拖箱仔拿下來！」

「恁怪奇，佢明明放左手析，仰會走到右手析呢？」二姑有兜仔敗勢講，「係啊！就講佢無拿，您就毋信，還緊賴佢偷。」阿美嫂試著當委屈。

「阿美嫂，可能吾二姑放到毋記得了！請您莫摻老人家計較！」

「佢就恁樣想，無正經會毋想做啊！」

「阿美嫂，您也恁老實，您淨尋左手析个拖箱仔，毋看右手析哦？」

「若二姑恁樣講，佢就恁樣做。東西尋著，無事情了莫計較了。」該二姑心肝肚想：妳係莫摻錢計較正著。

春到人間了，一蕊一蕊个花綻開鬧色彩，逐走所有个煩愁樣仔。三、四月天楊柳風輕輕柔柔吹，杏花雨毛點點斜斜落像輕煙像濛沙，山頭梅、櫻綻放一片水紅妝，路脣黃、紅風鈴鬧熱叮叮噹噹歌唱，校園个柑色炮仗花一片金黃，吊菜色畏羞个紫藤帶來迷濛，紅色、白色、黃色蘭花開容笑面，木棉大蕊綻放，幸福又鬧棚，春日花樹榮榮繽紛个風采，像活潑个細人仔，四處充滿生機摻笑聲，分二姑儕乜帶來新希望。秀彥買了一包肥料摻三個細盆栽：萬年青、七層塔、蔥蘭分二姑種，放到二樓陽臺，朝晨下晝就晒得著日頭，二姑歡喜講：

「恁得人惜哦！秀彥仰知佢愛種七層塔？成時煮吊菜仔、冬瓜湯、煎卵，就做得放哦！」

「二姑，係啊！自家有種愛摘就有，當方便。二姑，愛記得淋水摻落肥哦！差毋多兩個禮拜加一擺！」

阿美嫂足足照顧兩個月，二姑當煞猛復健，照醫生个指示企等踢腳、熱水敷、按摩，慢慢仔也做得拿拐棍仔慢慢仔行了。到二樓一開始係用爬，下來就扳等扶手倒退行。有一擺二姑問秀彥：

「你有發現屋下有麼个無共樣無？」

「二姑您買新用品係無？」

「毋係啦！秀彥，你看樓梯！」

「二姑，佢看著了，係樓梯加做不鏽鋼个把手。」

「分你揣著了！元中當貼心，請工人來裝。」「二姑，加裝這把手，您上下樓梯做得扳等有佷靠，就多一分个保障，恁樣更加安全，元中實在會想哦！」秀彥誠心阿腦元中，二姑聽著也歡喜。

元中逐個禮拜共樣會買鮭魚、排骨、豬肉、櫻桃、麵包、雞卵、水果來，阿美嫂無來後，元中去市公所申請長照，一日來兩點鐘，搵手去買菜、掃地泥、抑係搵手洗頭那毛、洗身腳，照顧到當好。老人家身體好了，心情也當好。

這一駁仔，秀彥接著通知，教育部客委會有舉辦全國客語讀劇比賽，教學組長講：

「秀彥先生，您一直教客語，自家又輒輒創作，每年也指導學生仔語文競賽，對學生仔較了解。這個活動第一擺舉行，你愛試看啊無？」

「承蒙組長，該比賽有規定个主題無呢？」

「內容無規定，做得自家創作，也做得參考全國客語朗讀比賽个文章，比賽辦法佢傳分你參考哦！」

「組長，好啊！佢來試看啊！」秀彥知了這消息就開始構思愛寫麼个主題，上課時也調查哪個同學有意願參加，續等愛寫文章，成時轉到屋，煮好食，就俵七、八點鐘。打電話分二姑，等異久正來接，佢就睡了，有時直接去看二姑，六、七點就睡目，秀彥想莫吵佢，就利用當晝、抑係四、五點打電話問候。有一擺二姑在電話旋旋風問：

「秀彥，若老弟正興頭路做來好無？」

「二姑，佢知佢做來順順仔！」

「佢講每年賺千過零萬，敢有影？」

「二姑，這佢就無清楚！知厥公司做電池个生理，有賺著錢。毋過無元中程式設計開發恁賺錢。」秀彥照實講。

「係啊，吾元中在臺南還有工廠，當闊哦！佢帶佢去看過了。該若老弟有賺錢，佢仰還緊膏嗟佢，愛賣該老屋大坵田呢？」

「二姑，這佢無了解。」

「你係大姊，正興敢無摻你聯絡？該大坵田係祖公業哪做得賣呢？」

「二姑，吾爸生前發病仔愛看醫生，正興無抽間，對吾爸講話呵呵咄咄惡豺豺當無款，育林看毋過去，就勸講：

『對阿爸做毋得恁樣，愛好好仔講。恁遽遽送來醫院，莫拖了！』

『吾林家事情毋使你管，出去啦！』正興堵過來，

『共樣喊阿爸，正興你仰般恁樣講？』

『干你爰事，你兜出去，莫來吾屋下！』正興拳頭嫵揮過來，正興抵擋，兩儕就打起來。佢愛拉開，嘎分佢兜推來搥去手腳也著傷，從該擺起勢育林就毋轉去林家。結果吾爸慢兩日送醫院，醫生講忒慢哩！」秀彥講出事情个頭來尾去。

「原來哦！正興恁樣做真毋應該！」二姑毋知姪仔會做出這種事。

年視年，日視日，熱天又到了，該阿姑个腳恢復了，也無長短腳个現象，秀彥下班帶豆腐花看二姑，摸圖牆頂高，無尋著鎖匙，就撒門鈴，

「鈴……，鈴……，鈴……」盡久二姑就無來開門，秀彥打電話。

「二姑，佢係秀彥，帶豆腐花分您食！」

「佢睡目了，你帶轉去啦！」

「二姑，圖牆頂佢無看著鎖匙？」

「元中講恁樣放，當危險，佢收起來了，佢愛睡目囉！」

「二姑，您自家愛細義，佢來轉囉！」秀彥攞等大盒番豆、綠豆豆腐花騎車轉去了。從二姑開刀過後，係講佢在二樓就無下來送秀彥了。

恁堵好，第二日元中傳 line 分秀彥：

「這下吾姆有長照照顧，疫情期間，為著安全，你毋使去看吾姆了。」

「好啊！元中你輒常出國，你也愛細義哦！」

元中講過後，秀彥有一陣仔無去看二姑，有一日當晝接著電話：

「秀彥，恁無閒係無呢？仰恁久無來呢？」

「二姑，元中有講您有長照照顧，疫情期間，為著安全，喊佢毋使去看您了，還過圖牆頂無放鎖匙，佢也落毋得。」

「係無？佢話著妳發譴無愛來哦！若老弟打電話來講，妳愛兩百萬正摺淑蘭帶去臺北歇，有影無？」

「二姑，佢從來無講這種話，吾老弟儘採講个。」淑蘭係秀彥盡大个老妹，當賢孝無嫁人，摺正興舖娘、妹仔、俵仔一家人歇共下，緊想愛逐佢走，秀彥當惜淑蘭總會寄錢分淑蘭。

「該正興恁花蓼，佢想佢無答應佢賣大坵田，妳無拿著 200 萬，正無歡喜無愛來看佢！」秀彥無想著老弟會講出這種話，佢更加毋知老弟還有好齣事來害佢。

該日放寮日六點零秀彥就接著二姑个電話。

「秀彥，妳有拿樓下个酒無？該係元中去金門做兵帶轉來个兩打金門个米酒。佢開刀後妳瞞著佢無下樓來送妳，就偷个。」

「二姑，佢無做這種事，育林胃毋好像火燒心、喉嚨會啞酸，醫生交代絕對做毋得食酒，佢無食酒，佢偷酒做麼个呢？」

「秀彥，二姑正經無想著妳會做這種事情，妳遽遽送轉來遽遽還佢。」

「二姑，佢正經無偷若酒……」秀彥旨講煞，二姑電話就掛忒了。育林聽著就問講：

「打早，麼个事情吵到恁夠穀線呢？」

「二姑講佢偷厥兩打金門个米酒。」

「佢從來無看著屋下有金門个酒，仰會恁樣講？」秀彥像秀才堵著兵，有理講毋清。

餵食晝邊仔，電話又來了：

「秀彥，妳還偷吾珍珠骰鍊、玉石、日本手指甲剪仔、膨線衫摺存款簿仔，愛遽遽還佢，若老弟正興講陳主任係酒鬼，妳偷酒分佢啲，食忒就算了，其他个東西愛遽遽還佢。」

「二姑，佢正經無拿若東西，元中講疫情期間為著安全，喊佢莫去；還過鎖匙無放圖牆頂，佢入毋去，仰般偷？存款簿仔您交分元中保管啊！」

「若老弟還講妳乜偷厥一隻紅寶石戒指，係若姆愛留分佢个。」二姑完全無聽秀彥解釋。

「二姑，莫聽吾老弟講花蓼，該係魯碧戒指，毋係紅寶石，係吾姆當等吾爸、吾老妹淑蘭頭前，講愛分佢紀念。佢還講分正興舖娘好無？阿姆講佢座大，定著愛分佢，佢無偷哦！」秀彥緊說明，育林聽毋過去，電話接過去講：

「二姑，秀彥佢做先生，還得師鐸獎，毋會做這種事情。」

「唉哦！兩公婆聯合起來欺負佢，佢愛報警告你兜，還愛打電話去學校講，分秀彥無辦法教書！」二姑嘶骸另命講。

「二姑，佢正經……」秀彥接過電話正愛講，二姑就掛忒了。育林問：

「二姑會係老癩俫無？仰會緊賴妳，佢識講過妳莫忒輒去，佢還有俫仔！妳看這下分人過嘴，分人賴，當毋值哦！」育林乜係毋盼得秀彥分人糟蹋，尤其自家老弟正興還生是非講阿姊做賊，一般人會代阿姊講話哦！佢顛倒使梟。包尾聽淑蘭講，因為這件事正興還請幾個表舅、表兄弟在屋下食酒，講秀彥做賊偷酒、偷東西个事情，無幾多日家族就知秀彥做賊分阿姑捉著个事，秀彥當無奈。

秀彥為著自保，line 分元中講：

「元中，佢無拿二姑任何東西！若姆冤枉佢。」

「敗勢，妳受委屈了。吾姆四處懷疑別人愛害佢，別人愛偷厥東西。」

「佢去看二姑，係珍惜該親情，無貪麼个，嘎畀賴做賊，佢異難受。」

「當初吾姆歇吾屋下時，歸日仔懷疑竹梅愛偷厥錢，講佢兜挑事煮佢毋好食个東西，毋分佢食飯。」

「元中，辛苦你兜哦！你無講佢完全毋知！」

「吾姆還講，竹梅存心愛害佢，愛餓死佢，吾姆有被害妄想症。」

「難怪竹梅無愛轉二姑屋下，還過吾老弟誣陷佢，係因為吾爸發病仔歇院个事情，正興識摻吾頭家冤家，打壞感情正恁樣報復。」

「佢知，正興表哥有打電話分佢，問講愛賣該坵大坵田無？佢無應承，因為吾姆有交代祖公業愛保留。」

「這站仔若屋下出出入入个人恁多，仰賴佢一儕人？」

「吾姆記才當好个，跌忒東西應該係正个，聽佢講長照毋知有酒，阿美嫂發誓講佢無偷，係偷酒會分車仔撞死。還過吾姆去問媽祖姑婆，跌三到就聖筊，講係你林秀彥偷个。」

「元中，時代恁進步，二姑無證據就賴佢，係毋係佢共樣愛去厥面前發誓，佢希望你兜去報警，還吾清白。」

「算了！莫摻老人家計較！」元中本且還嫉妒秀彥。阿姆恁惜佢，這下嘎當同情佢了，無想著秀彥恁貼心陪阿姆，仰般摻自家共樣分阿姆嫌分阿姆怨。

秀彥驚怕二姑打電話到學校鬧，先請教社會科先生，乜摻人事室通報一聲，莫因為老人家老癩俫害自家失忒頭路，該就毋值，乜無面子繼續留在學校教書哦！秀彥想起有句詩詞：「我本將心照明月，誰料明月照溝壑。」正經寫出自家个心情，毋過佢毋會怨，可能二姑係一時頭腦無清楚，分自家个好老弟正興煽動了，正會恁無理性賴自家，秀彥還惱等二姑企在門口頭勾勾攢手送佢个情景，就像拈轉做仙个阿爸還守顧等自家个樣仔……